

PAGTULON-AN 3 - ANG UNANG PILOTO

Genesis 5:1-32

TEMA: Pagpasidaan sa mga dili luwas ug pag-andam sa mga magtotoo sa ilang pagsakgaw ngadto sa langit.

Unsa ang imong gustong paagi sa pagpanaw? Daghang mga tawo mugamit sa sakyanan sa kahanginan, apan gusto ka ba mupanaw sa kahanginan nga dili mugamit ug sakyanan? Adunay tawo sa Bibliya nga nagapanaw sa *DALAN SA KINABUHI* ngadto sa kawanangan nga wala mugamit ug sakyanan sa kahanginan.

Human gipatay ni Cain si Abel, ang Dios mihatag ug laing anak nga lalaki ni Eba ug kini iyang gihinganlan ug Seth. Ang Dios nagsaad ug Manunubos ug gusto Niya mahimugso kini sa diosnon nga kaliwatan. Apan sa pagpanglabay na sa mga katuigan, ang mga tawo midaghan dinhi sa kalibutan ug ang pagkadautan mipadayon sa pagdagsang. Ang matag tawo kinahanglan mopili sa dalan diin didto siya mosubay. Kadaghanan mipili sa dalan nga *daw matarung* sa tawo, apan pipila lamang ang mipili sa dalan sa pagtoo.

Ang mga katawhan nabuhi sa tag-as nga mga katuigan. Atong mabasa ang mga edad sa mga kaliwatan ni Seth, Genesis 5:6-32. Ang pinakataas ug edad mao si Metusela kinsa nabuhi sulod sa 969 ka mga katuigan. Si Metusela anak ni Enoc kinsa atong tawagon nga unang piloto.

Imo bang namatikdan sa imong pagbasa niining bahina sa Bibliya nga ang kasaysayan sa matag tawo, gawas sa usa; gitapus niining tulo ka mga pulong, “ug siya namatay”? Ngano man? Tungod kay ang suhol sa sala mao man ang kamatayon. Mobati ba kitag kalipay sa pagtan-aw sa usa ka patay? Niining maong pagtulon-an atong makat-onan, adunay paagi sa pagdaug sa kahadlok sa kamatayon, ug posibli nga pipila kanato *dili* tingali makasinati ug kamatayon!

Si Enoc naglakaw uban sa Dios, Genesis 5:24. Si Enoc adunay pakigsandurot kauban ang Dios, naglakaw siya pinaagi sa pagtoo. Kini usab nagakahulogan nga si Enoc naghalad sa hustong halad. Ang duha ka tawo makalakaw lamang nga magkakuyog kon sila nagkauyon, Amos 3:3. Ang pagtoo ni Enoc nakapahimuot gayud sa Dios. Si Enoc kanunay gayud nga nagwali ug nagapanghimatuod, Judas 14-15. Ang mga tawo nahimong dili diosnon. Sila nagakinabuhi diha sa ilang kaugalingong mga pamaagi, nagpanulti sa pagdayeg sa mga tawo ug kanunay nagabagulbol batok sa Dios. Si Enoc nagapasidaan kanila nga ang Ginoo muabut apan sila nagapasipala lamang.

Usa ka adlaw, si Enoc nagpangidaron sa edad nga tulo ka gatus ug saysentay singko (365) katuig, diin siya nahanaw. Pinaagi sa pagtoo, siya *gikuha*, Hebreohanon 11:5-6.



Tinubdan: Sweet Publishing - kini i ilustrasyon lamang sa kamatayon sa tawo

Wala nato masabti giunsa siya *pagkuha* sa Dios. Hinuon, usa ka kahibulongang butang mahitungod niining maong panghitabo nga kita makasiguro unsa ang mahitabo sa mga magtotoo diha sa **TUGPAHANAN SA GRASYA** sa umaabut nga mga adlaw. Ang Dios nagpadayag ug usa ka tinago ngadto kang Apostol Pablo, nga adunay adlaw nga muabut nga ang Ginoong Jesu-Cristo mukanaug gikan sa langit uban sa tawag sa trumpeta sa Dios. Ug ang mga nangamatay diha kang Cristo mamangon pag-una.

Ug kadtong mga buhi nga mga magtotoo sa maong panahon *pagasakgawon* uban kanila sa pagsugat sa Ginoo diha sa kahanginan, 1 Tesalonica 4:13-17. Kini kasagaran nga gitawag nga Paglalin nga nagakahulogan *pagsakgaw ngadto sa langit* sa mga magtotoo diha sa Iyang Iglesia nga mao ang Lawas ni Cristo. Ang mga magtotoo niining maong Iglesia gihulagway diha sa mapa nga **SAKYANAN SA KALUWASAN**.

Si Pablo nagtawag niini nga hitabo: ang atong bulahang paglaum , Tito 2:13. Dili kinahanglan mahadlok kita sa kamatayon kon aduna kita niini nga paglaum . Ang uban moingon: “Ako nagapaabut sa Ginoo nga mobalik,” ug unsa kaha katinuod kana nga sulti. Dili na kita angayan nga magsubo alang sa mga nangamatay, kon tinuod man nga sila luwas tungod kay kita nasayud nga kita pagadad-on sa langit kauban niadtong mga nangamatay diha kang Jesus. Usa kini ka kamatuoran nga makalipay. Gusto sa Dios nga mangabig ta sa mga tawo samtang nagapaabut sa *Paglalin*. Gusto Niya nga kita magapasidaan sa mga tawo mahitungod sa suhol sa sala ug magsulti kanila mahitungod sa kinabuhing walay katapusan diha kang Cristo.

Human ang mga magtotoo malalin o masakgaw gikan niining kalibutan, ang makalilisang nga panahon sa paghukom muabut na. Unsa kaha kasubo nga bation kon ikaw malalin apan ang imong amahan ug inahan mahibilin. Imo na ba silang gisultihan mahitungod sa Ginoong Jesus nga nagpakamatay sa ilang mga sala? Unsa kaha kamakauulaw nga ikaw nagabuhat ug butang nga dili makapahimuot sa Dios sa adlaw sa paglalin. Ang labing maayo mao nga magkinabuhi kita nga hinlo, putli sa tanang panahon.

Sa ika upat (4) nga pagtulon-an, atong tun-an ang mahitungod sa dakung paghukom nga miabut sa kalibutan human si Enoc gilalin. Nakasiguro ka ba nga nakasakay ka na sa SAKYANAN SA KALUWASAN, samtang naghulat ka ni Jesus nga mobalik aron sa paglalin kanato uban Kaniya?

SAG-ULOHON NGA BERSIKULO: “Ug kita nga mga buhi nga mahabilin, pagasakgawon ngadto sa mga panganud uban kanila sa pagsugat sa Ginoo diha sa kahanginan ug sa ingon niini kita magapakig-uban na sa Ginoo sa tanang panahon.” 1 Tesalonica 4:17

PAGTULON-AN 3 – BULOHATON

Direksyon: Linyahi ang hustong pulong o mga pulong nga mukumpleto sa gipahayag.

1. Si Adan nabuhi (100 katuig / 530 katuig / 930 katuig). Genesis 5:5.
2. Si Metuselah nabuhi (559 katuig / 969 katuig / 150 katuig). Genesis 5:27.
3. Ang amahan ni Metuselah mao si (Noe / Enoc / Moises). Genesis 5:21.
4. Si Enoc nagalakaw kauban sa Dios ug usa ka adlaw (siya namatay ug gikuha / siya gikuha nga wala namatay). Hebreohanon 11:5.
5. Si Pablo nagsulti sa mga magtotoo nga taga Tesalonica (ang tanan mangamatay / ang uban dili mamatay). 1 Tesalonica 4:16-17.
6. Si Pablo nagatawag niini nga panghitabo nga (makalilisang nga butang / bulahan nga paglaum). Tito 2:13.
7. Kita makasiguro nga kita pagasakgawon aron magapakig-uban sa Ginoo kon Siya mobalik (kon kita magaampo matag adlaw / kon kita magabuhat ug maayo / kon kita motoo nga si Jesus namatay ug nabanhaw pag-usab). 1 Tesalonica 4:14.
8. Kita mosugat sa Ginoo (dinhi sa yuta / didto sa bukid / diha sa kahanginan). 1 Tesalonica 4:17.
9. Paghimo ug duha ka listahan: mga butang nga gusto nimong buhaton kon muabut si Jesus ug mga butang nga dili nimo gustong buhaton kon muabut si Jesus.

Gusto nakong buhaton:

Dili nako gustong buhaton:

- a) _____
b) _____
c) _____
d) _____

10. Isulat ang 1 Tesalonica 4:17 _____

